


Vom Bergwerck

Drey gleiche seitten eines triangells/des ecken oder winckell alle spitz seindt.



Der halben so ein stolle 90 lachtern lang ist/vn ein lenge zehn lachtern durch hauwen/so wirtt sie den mittelsten boden des letzten schachts berüren/wan aber die schäct fünff vnd neunzig lachtern tieff seindt/so ein grüben in die tieffe fünflachtern ist gehauwen/wirt der letst schacht bis zum boden des stollens kōmen. So aber ein triangell wirt/des winckell alle spitz seindt/aber zwei seitten allein gleich/welche seindt/die erste vn dritte/so ist als dan/das ander vnd das dritt mes nicht gleich/der halben mögendl auch die weitte darzwüschen nicht gleich sein: als nemlich so das erst mes sechs quārschüh lang ist/das ander vier/das dritt/widerumb sechs/aber die ander schnür hundert malen vnd ein malen sechs quārschüh/das ist hundert vnd ein lachter/so wirtt zwar die weitte darzwüsche/die da ist zwüschen dem mundloch des stollens/vnd boden des letzten schachts/mitt seiner lenge sechs vnd sechzig lachter vnd vier quārschüh erfüllen. Aber die weitte darzwüschen/so da ist zwüschen dem mundloch des ersten schachts/vnd dem boden des stollens/wirt hundert lachter tieff sein.

Zwo gleiche seitten eines triangells/des winckell alle spitz seindt. A. B. C.



Der halben so der stollen sechzig lachtern lang ist/so ist das teil des gebirgs/welches durch zehauwen ist/sechs lachtern lang/vn vier quārschüh. Aber so die schäct siben vnd neunzig lachter tieff seindt/so drey lachter in die tieffe auf gehauwen/wirt der letst schacht/den boden des stollens erlangen. So aber ein triangell ist wordenn/des ecken alle spitz seindt/vnd aber drey vngliche seitten/so kōnnendt widerumb die weitte so darzwüschen nicht gleich sein. Als nemlich so das erst mes/siben quārschüh lang ist/das ander vier/das dritt sechs/die ander schnür aber hundert malen vnd ein malen siben werckschüh/das ist hundert vnd sibenzehn lachter/vnd vier werckschüh/die weite aber darzwüsche/die da ist zwüschen dem mundloch des stollens/vnd dem boden des letste schachts/wirt vierhundert werckschüh zusammen bringen/oder sechs vnd sechzig lachter/die weitte aber darzwüschen/die da ist zwüschen dem mundloch des ersten schachts/vnd des stollens boden/wirt hundert lachter tieff sein.

Drey